

9 Bii nn kpɛlɔ n sohd mà man bii, nn homr mà noon n yum mà hɛna bii, hɛm-n-b²! Lee wen, Sangband si-n nigligu d`bem n`man.

10 T` Berm Yeesua sira-ma nyaagb biii, blaɛb kaa, n` bee n werii na n`la deera mà jugun. Biilm, n` deera mà jugun hɔm, gwɛntaɛ, n` da ba nyaan huru na n`werii-ma welee.

11 Mà gwɛɛla welee, lag na man halwa l`kaa. Baa l`la ba lan, maa mà neer. Mà kpɛlɔ l`mɛngu. 12 Mà miil man neer bii wen kpaɛ lee wen, ka ta mi man neer l`wen tɔr lee. Mina bii bee na mà di laa kɔm kua-ma, mina mà ba kwɛgdm laa katɛdga, mà kpɛlɔ l` mɛnguun neerm. 13 Mà bea l` mɛngu n hii hà haɛla-ma wii, wii nnii Krista.

14 Ln la ba welee lee, n` hɛm hɔm n tɔr-ma mà kunyɔɔɔ deb. 15 Filiifi tiiba-n, n` miil hɔm na man da baɛ Masedonii n ka faa Gohɔmt n dan n nyab n`man lee, n` kpaturhuu n jaɛ da tɔra-ma. Mà n nn t` da lagaa taa ka sohdà tn halwa bii.

16 Man da taai Tesaloniik yelmaa lee, n` baɛ ree n tuun-ma tɔmb mɛɛm² man da halwa bii.

17 Mà kpaa fɛba ka bag na bá saɛm-ma want. Man bag bii nnii na Sangband hewl bii nn sohdà bii hɛn, l`yadg n nn n`saɛb kaa.

18 Mà sohdg nn tuun bii mɛmbii. L`yatg man da halwa bii. Man sohdg Hɛfafrɔɔdita nuhun nn tuun bii lee, bii ta kpaa fad-ma. N`wantii boo *vit Sangband nn sohdà na t` ruhu bee-d loogu tii.

19 Mà Sa Sangband ba n kɛgt biii. D`kee d` tag n Yeesu Krist d` si-n bii b`fad-n bii mɛmbii. 20 Bá nyɔkm t` Sa Sangband kakeɛnan! L`bem welee!

21 Seen-n sangbantiibee mɛmbee hayen hayen! Bá n Yeesu Krist l`laglg yena.

T`teelba bá ba mà man bee seenja-n. 22 Sangbantiiba bá ba nnaɛ bee mɛmbee ta seenja-n, hurbermaa rebee mɔmba.

23 T` Berm Yeesu Krista hɔmgu bem n`man!

4.9 Bii nn kpɛlɔ n sohd mà man bii, nn homr mà noon n yum mà hɛna bii, hɛm-n-b! Baa bà bee bà ta hɔm na Bii nn kpɛlɔ n sohd mà man bii, nn homr mà noon n yum mà hɛna bii nnii. Hɛm-n-b!

4.16 Tɔmb mɛɛm. Baa bà bee bà ta hɔm na tɔmb mliim.

Fɔɔla wadga han da hɔd

KOLɔɔS TIIBA

kee

— B`ba wadgankenan bii —

Fɔɔla hɔda wadgankena Kolɔɔs Krista tiiba. Kɔrguu da ba Hasi kpadn, goona Tirkii tantn. L`boo Fɔɔla ban san kan n yum. Wo hà ɛmɛɛheeduur Hɛfafraaswii mɔma nn ba na Kolɔɔs tiin lee, wii da san kan n Gohɔmt noogrm, lee, n kool kan kpaturhuu.

Fɔɔla da ba sargan Roomaa kɔrgun, Hɛfafraasa t san n bɔhɔɔ-wu na biiba haama Kolɔɔs Krista tiiba rarm n gokwɛɛnt tiit. Bee laɛba bɔhɔɔ na saɛ na Krista tia miig Sangband hɔm hà sohdg jugu daɛb, l`ba na hà door vohoomn gemmnt tiit kwɛɛn, l`saa bà hee-wu kowt tiit wo bɔtgm, hà valgm diit n daam sent dee dee. Ban bed-wu welee lee, Fɔɔla t hoorm-ba wadgankena ka deeda-ba na jugu daɛb Sangband nn sir ka tagaa n Yeesu Krist bii taara welee.

– Hubi1^{9a} kakeɛnan hubi2^{9a}, vug19^{un}, Fɔɔla ree Krista huraant gwɛɛt n bɔhɔɔ na bá miim na hà ba n gemmnt ka yata l`mɛngu, na wii nnii kpaturu jugu tia.

– Hubi2^{9a}, vug20^u kakeɛnan hubi4^{9an}, Fɔɔla deeda-ba neerkwɛɛlm ban neer ka laglg n Krist mii beeb, n ln ba na bá neer-m kpaturun n hayan n nan kɔrgun lee. Hà toglg ka bɔhɔɔ-ba hayen hà jugu gwɛɛt jugu jugu ka ta seenja-ba.

Seenɔb

1 1 Man nnii Fɔɔla, Yeesu Krista *tumta. Sangband sɔkl n hɛm na mà kitg welee. Mà n t`teel Timotee t`hoora wadgankena 2 ka seenja t`teelba Sangband reba nen, nen ba Kolɔɔs kɔrgun ka lagl n Krist n ka nawr n wun nen. T` Sa Sangband hɔmgu n hà nigligu bem n`man!

Fóola seenja Sangband na d' herá ηmεεǵb

³ T`wen seenja n`hen, t`ka bohóo Sangband t`Berm Yeesu Krista Sa kutuuu na wii herá ηmεεǵb. ⁴ Biilm, t`kewii na n`tia Yeesu Krista hen, ka sókla Sangband rebee mεmbee. ⁵ N`gwεet hen tiim n`sóklibii bahra n`daǵb nn ba n`b`hóo-n sangbambiiimn bii jugun. N`ba n`welee daǵbii l`bahr n`na n`fεtg gobiint gwεet humb, tii nnii Gohómt. ⁶ T`yadгаа n`tighee mεnhee ka roon roonhóma wo tn taan n`man n`ka ta hεna lee, l`log goor nn homr n`sohd gobiint gwεet l`hel Sangband hómgu dii. ⁷ T`teel Hεfafaasa werii-n-t. Há ba na t`ηmεεheedtuurn. T`sókla-wu hóm. Há ta ba na Krista ηmεεheedhóm há lagaa-t n`man wii. ⁸ Wii kεem-t na Sangband *Vohoom hεna ηmεεǵb n`huuga n`sókla Sangband reba.

L`MεNGUU BA KRISTA NI KPAALAA**Fóola yuuma yumga ka seenja Yeesu Krista**

⁹ Lee, l`log gonoogrd tn homr n`ret dii, t`ka seenja Sangband kutuuu ka gbaama-d na d`Vohoom si-n rarm n`rabiilm, l`saa n`miig d`sóklib hóm, ¹⁰ ka sug na n`neer l`magr n`t`Berma, ka hεna ηmεεhómt mεnt, ka berηa Sangband miibn, l`jeenja-wu. ¹¹⁻¹² T`ta gbaama-d na d`hahlg-n kpaalaa n`dyen d`nyókbermb gemmnt na n`mad hóm ka ju kwεεwr l`mεnguun.

Seeijm-n Sa Sangband ka ba nyaaǵbn na wii herá ηmεεǵb! Wii herá na n`yuun n`kaalaja kεgt t`hóo d`reba gobiint wiinga kan ba ree.

¹³ Biilm, d`ree-t nyeet gemmntn
n lo-t d`Budahómga huraantn.

¹⁴ L`tag n`kee n`dahm t`juuni,
l`waa t`fubεhii.

¹⁵ Hii kpaá yu Sangband.
Krist lee, wii rea d`beeb ka weráa nidba.

Wii nnii dn ree bii mεmbii jugu tia,
¹⁶ l`kótóo na d`tag n`wii le n`ree l`mεnguun,
b`ba sangbambiiimn bii laa tant hen bii,
t`reb yu bii laa t`reb kpaá yu bii,
mig na huraant laa, bermt laa, gemmnt tiit,
Sangband tag n`wii le n`ree l`mεnguun.

Wii ta hefl n`l`mεnguun.

¹⁷ Há manna l`mεnguun nongan.

Wii hεna na want ment bεm t`kaalant.

¹⁸ Wii nnii jugu,
há gbanu nnii Sangband kpaturu.

Wii nnii neerm koolgm.

Biilm, wii nnii noogr Sangband nn himii kpiirma huuga na há bεm na wii nnii berma dn ree biin.

¹⁹ D`sókli welee na
d`Budaaga mad d`beebii mεmbii.

²⁰ D`herá welee na
d`ku gwεet d`n`b`ba tant hen laa sangbambiiimn bii l`huuga,
d`daan n`nigiigu.

D`herá welee ka vid d`Budaaga *dabragr hen.

²¹ Nen lee, weem n`da ba vóku n`Sangband ka ba na d`rafeedban l`bahr n`na n`da ba n`diilbεha há hεfr-n`hεna hεbbεhb. ²² Gwelηa Sangband kura gwεet d`n`nn`huuga ka tagaa n`d`Budaaga. Ká gbanu ba na nida gbanu mómun, ká kuum ka sug na n`bee n`bεm kpelah', tiit kpaah na bá biir n`hen, ka ba sóbb d`nongan. ²³ Kpat-n nan ka mad n`gwεet hen tiim l`bu ka kpaá bóraa n`daǵb nn ba n`bii, l`log goor nn sohdg Gohómt dii! Gohómtii yadгаа n`tighee mεnhee. Fóol man, mà ηmεεǵb nnii na mà faam gwεetii.

Fóola jul kunyóηu kpaturu ηmεεǵbn

²⁴ Gwelηa lee, mà jul kunyóηu n`kaa ka la ba nyaaǵbn. Krista wiiru hian da homr huu, huu nnii man fela humb há kpaturu hú ba na hayen há gbanu huu kaa. ²⁵ Kpaturu kaa nnii Sangband nn kótg-ma na mà fanm d`gwεet. Dn gbaama-ma bii nnii na mà faam-n-t kpaalaa. ²⁶ Tii nnii fohmgan gwεet dn kpehdr wai mεmehii tii n`ka rea-t gwelηa ka weráa d`reba. ²⁷ Sangband herá welee ka bag na d`reba miig na d`sókli na *bá kpaah na Yuudaa tiiba bee miig d`fohmgan gwεetii nyókbn n`t`kεgt. Tii nnii na Krista ba n`ni. Wii saa na n`bεm n`daǵb n`nyókbn b`hóo-n sangbambiiimn bii hen. ²⁸ Krist nnii tn fan, ka bahla, ka weráa baaben tiwu n`rabiilm móm. T`hεna welee ka bo na baaben tia bi wú n`Krist bá laglgmn. ²⁹ Tii kaa nnii man jaarηa mayen ka taaw hoodr mà ηmεεgt hεbn n`Krista gemmnt t`hεna ηmεεǵb mà ni tii.

KI

2 ¹ Mà bo na n`nyaan lan nnii hoodr man taaw n`kaa dii nn ba gemm lee. Mà ta taawa-d Lawodisee tiiba kaa n nan biiba bá ban nyaan-ma n yum bee mēfba kaa. ² Mà taawa welee hoodrii na n`mēmbēe n`bēm n`ηmeenm ka mad taa soklbn ka sug na n`bēm n`rariilm mōmm, m`saa na n`miig Sangband fohmgan gwēet. Fohmgan gwēetii nnii Krista. ³ Wii ni nnii rariilm kēgt n`Sangband miib kēgt mēnt nn bee. ⁴ Mà bōfōō-n welee ka sug na hii daa hogl-n ka lēlaa gokaat gwēet. ⁵ Man la kpaā nyōhr n`nn lee, mà diila n`jugun. Mà hugl n`nyaağb na n`neera wo ln gbaama lee n`nan n`Krista hēn tiim nn hafr lee.

Krist nnii rariilm mōmm

⁶ Wo nn tii na Yeesu Krist nnii n`Berm lee, neer-n ka nawr n`wun, ⁷ ka bah rugi há ni, ka mōh n`neerm hà hēn, ka hafr n`gwēet hēn tiimn wo ban da werii-n lee. Hēm-n welee mēnguu ka seenja Sangband na dii hēra ηmēēğb!

⁸ Bēm-n baw ka sug na hii daa hogl-n tiit l`bahf n`nidba nn diila tii, l`kōtd na t`kpañ n`jugu. Welee weriibii hēla kowt nn kudr tii n`nan tantntina hēn gemmnt, ka kpaā bēd n`Krista neerm, ⁹ l`ba na Krista gbanu mōmu ni nnii Sangband nn ba kpaalaa. ¹⁰ Nii ta ba hà ni ka hugl n`l`mēngu. Wii nnii bermt mēnt n`huraant mēnt huraa. ¹¹ N`n Krista n`laglgm weraa na n`ta *bōtg nnii. Gwentafaa, lag bōtgm nidba nn hēna mii, Krista bōtgm. Mii rea bēhgu nida ni. ¹² Welee lee, Sangband *nyaalm huurbn, n`kpiira bá kuur-n n`n Krista, n`ta himt kuumn n`n wun l`bahf n`na n`tii na Sangband himii-wu kuumn n`d`gēmmnt.

¹³ Nen, nen da kpiir n`bēhgu n`nan ban da ba bōtg-n l`kaa nen, Sangband ηmēlg-n neermn ka tagaa n`Krista.

D`logra t`bēhguu mēnguu n`safm-t

¹⁴ ka kpia gwēet t`da tula-t hoogu yaagu wadgan tii, ka kpañ yaagu wadgee *dabragr hēn.

¹⁵ Welee nnii Sangband nn her n`hofl huraant n`bermt mēnt tija. D`ree-t n`diin kōrfand huuga sarga tiiba dela ka hēfr-t nidfigm m`hirwa d`Budaaga kaa miin. Kee diira jugun.

¹⁶ Tii lee, daa saa-n na hii yaa-n n`yaagu n`bii n`reb ju laa n`reb

nyi laa kasant tiit laa kidkwēelga laa *Saabaat goor kaa! ¹⁷ Welee wantii ba na bii b`kena n`nongan bii tōgiitn. B`bee bii mōmb nnii Krista. ¹⁸ Daa saa-n nan na biiba di n`jugun! Bà kōkma na bà hōfla bayen n`tija, ka door *sangbantumtba kwēen. Bà lōō nōmb kōd bá jaamiit jugun, bayen bà diila hēfr-ba bà jahra bayenwu yem. ¹⁹ Bá welee hēbii mēmbii hēna bà kpaā nawla bayen n`Krista, l`ba na wii nnii jugu. Wii safh t`gbanu gēmmnt. Wii hēna na gbanhuu mēnhuu togr n`taa ka tagaa n`hù toga n`hù geela. Sangband mōmr hēna na gbanhuu berhjm.

NEERM M`BA KRISTA NI MII

Há laglg n`Kristwii ba hayen hà bolmrn

²⁰ Ka n`n Krist n`kpiā, l`ree-n tantntina hēn gemmnt kwēen. ¿ Ben kaa nnii nn ta hēna wo n`neerm ba tantntina hēn gemmnt kwēen ka tia na bá nyaglgm-n sent tiit? ²¹ Na daa lōg binahf, na daa ta lem binahf! Lee na daa ta taruu binbii! ²² Welee sentii mēntii, ¿ bà kpaā hēna-t n`ηmēēğb t`kōhla? ¿ T`kpaā ba na bahlb n`weriib nida nn kudr bii nnii? ²³ Biilm, welee sentii tōna rariilm ret, l`bahf n`na bá mad-t bee sokla na bà door want tiit tija, ka hōfla bayen n`tija, ka dadra bà gbani, l`ba na l`mēnguu ba yem ka kpañ l`bee l`tōrg nid na há mad hayen.

3 ¹ Ka l`ba biilm na n`n Krist n`himtg kuumn n`ka neer, bagm-n nan bii b`ba sangbambiimn bii! Ree nnii Krista nn kad Sangband najuudu hēn. ² Yaagr-n n`bii b`ba sangbambiimn bii wee l`yata tant hēn reb! ³ Biilm, n`n Krist nn laglg lee, n`kpiira n`neerm t`ka ba fohmgan Sangband man. ⁴ Krist nnii n`neerm. Goor há daa rea hayen na bá nyaan-wii, goorii, n`n wun n`bewlg n`riir n`radg taa hà nyokb.

Neerkwēelm

⁵ Kpii-n tantntina hēn neerm m`ba n`ni mii! Mii nnii neerbēhm laa, nakakeet laa, diilbēha laa, nōmvuurhu, laa butoogu. Butooguu ta ba yenmii wo vn ta ba v`door boga tija lee. ⁶ Welee hēbbēhbii mēmbii via Sangband kwēeweerga n`biiba bà kpaā vala-d bee jugun. ⁷ ¿ Lag nn da ta neer nnii n`wen da vēfr welee fubēhii ni?

KI

⁸ Gwelŋa lee, gwid-n tintii kaawr! Tii nnii kwεεwweerga, kwεεwkpiqidŋa, talmt, suut, n gobεft bōhōob. ⁹ Daa hoglm-n taa! L`kōtōd na n` saa n` neerkpeemm ¹⁰ n ka neer neerkwεεlm. Sangband mōmr lagaa-n, ka tōnaa-n n dyen, ka manyaa n` neerm ka sug na n` bee n` miigiim-d hōm. ¹¹ Gwelŋa lee, raarb biib ta kpaŋ n` huuga. Mig *Yuudaa tii laa *há kpaŋ na Yuudaa tia, mig bà reŋa *bōtg laa bà reŋa ba bōtg, mig há nōnga ba wentg wii laa há neer wo kram dōm wii, mig yuum laa há ba hayen hà bolmrn wii, lag tii nnii bii. B` ba daft bii nnii Krista. Hà ba n` ni baaben tia ni, ka ba na l`mēnguu nnii.

¹² N` ba na Sangband reban. D` kōtg-n n ka sōkla-n. Welee kaa, bεm-n n beeb hōmb ka hēna hōmgu ka hōfla ŋyenwu n tiŋa ka ba heee ka ju kwεεwr! ¹³ Jum-n taa n kwεεwr vol wo vola! Ka n` ni hii t kōfl hà tuurwu n gwεεt, wulaŋ lōg hà si-wu. Waam-n taa bεhgu vol wo vol wo Berma nn ta waa-n n` fubεhii lee! ¹⁴ L`mēnguu huuga, lōm-n sōklb nōngan, bii lagla-n n taa kpaalaa. ¹⁵ Krista nigiiigu hugl n` kwεεwa! Kuu tōra na n` lagl n` he nidyena. Seeŋm-n Sangband na dii herā ηmεεgb!

¹⁶ Saam-n Krista gwεεt neer n` ni t`n t` kεgtii mēntii! Weriim-n taa ka ta hagla taa n rabiilm mōmm! Yuum-n ka seenja Sangband n` kwεεwr mēnd na dii herā ηmεεgb n` *Wadbuudgan yumii n ta nyōkb yumii n nan yumii *Voŋoom Buudm nn ba m` lōm n` ni hii. ¹⁷ Bii n` reb ba n` hēm bii laa tiit n` ret ba n` bōhōom tii, hēm-n l` mēnguu Berm Yeesua hidrn ka tagaa n wun ka seenja Sa Sangband na dii herā ηmεεgb.

Krista tiiba haar

¹⁸ Fōgba-n, hōflgm-n ŋyen n` sidba kwεεn! Welee magra n fōgba bá lagl n Berm bee. ¹⁹ Sidba-n, sōklm-n n` fōgba ka kpaalaa tohd-ba n n` noora! ²⁰ Bii-n, buuŋm-n n` reba kpaalaa! Berm n` n` hà n` lagl wii nn nyaaga n bii nnii. ²¹ Samba-n, daa hēm-n n` bii ni bida n nn ka bo na n` neerm daa riir-hi loogu!

Bermba n bà yuummba huuga neerm

²² Yuummba-n, buuŋm-n n` bermba bá mad-n tantntina hēn bee kpaalaa! Daa buuŋm-n-ba bá wen jehr n` jugun n jaf ka bo na l` hēm-ba hōm! Gwentaf, hēm-n welee n kwεεwhōmr l` bafn n na

n` sol Berm Krista! ²³ ŋmεεgt n` ret hēna-ba tii mēntii, hēm-n-t n` kwεεwr mēnd wo l` biir na n` hēna-t n` Berma mōma, lag na nidba! ²⁴ Há man nnii nn nan sōhda n` fat. Tii nnii kεgt t` hōd hà reba tii. Krist nnii Berm nn hēna hà ηmεεgb wii. ²⁵ Lee, miim-n na há hēna bεhgu wii nan sōhda hà bεhgu fat! Deer-n hōm na Sangband kpaalōo raarb nidba huuga!

4 ¹ Yuummba bermba nen, mad-n n` yuummba hōm wo In gbaama lee, ka ta mi welee na n` mōmba n` ta ba n` Berma. Hà ba sangbambiimn.

Baŋlkaawrb

² Seeŋm-n ka kpaalaa saa! Bεm-n keliigu welee hurhuu noon ka seenja Sangband na dii herā ηmεεgb! ³ Ta seeŋm-n t` hēn na Sangband si-t huru na t` bee t` faam d` gwεεt, na l` tōrg-t na t` bee t` ree fōhmgan gwεεt t` hēl Kristwu tii t` werii. Biilm, tii kaa nnii man ba sargan. ⁴ Ta seeŋm-n na d` si-ma gemmna na mà bee mà faam fōhmgan gwεεtii hōm wo In gbaama lee!

⁵ Bεm-n n rabiilm beeb n biiba bà kpaalaa seenja Sangband bee wee, ka wayaa n huru In saŋ-n huu ka bōhōob-ba Sangband gwεεt. ⁶ Gwεεt t` ba t` rorm n` noon tii bεm loogu na bá kewlgm t` jiba nida kwεεwrn, n` ta miigaa lan nnii nn ba n` leedgm gwεεt lee.

Seenja

⁷ Mà tamna Tisiikwu n` man. Mà teelhōmn. Berma ηmεεheedbuudn, ta mà ηmεεheedtuurn. Hà ba hà biir-n mat. ⁸ Mà ret tamna-wu tii mōmt nnii na há biir-n bii b` gēta t` jugun bii hà lagl hà doolg n` kwεεwa. ⁹ Mà tamna wú n` Hōnεεsima. Há ba na nidbuudn, mà teelhōmn, ŋyen n` teeln. Bee beel bà biir-n b` gēta t` man bii.

¹⁰ Hāriistarka seenja-n. Hà ta ba sargan mà man. Barnabaasa hēεtuur^z Markuusa ta seenja-n. Bà fεtg-n hà ret bōhōob. Ka l` boo hà daan n` man laa benii, sōhdg-n-wu hōm! ¹¹ Yeesu bà reŋa daarŋa na Yuustuus wii ta seenja-n. Batahrbee n jaf nnii *Yuudaa tiiba má n` bà t` hēna *Sangband huraant ηmεεgb. Bee doolg mà kwεεwr.

^{4.10} Hēεtuura. Grεekmn gwεεgu humb ba tōmb mliim. Baa bà bee bà ta ree na hēεma.

¹² N̄yen n` teel H̄efafraasa ta seen̄a-n. H̄à ba na Yeesu Krista η̄m̄ēēhedn. Wo han ba na Krista η̄m̄ēēhedn lee, h̄á ka kpaá saa n` h̄en seen̄b. H̄á seen̄bn, h̄à gbaama Sangband na n` mad l` bu, n` b̄em h̄omba kpaalaa ka hof̄lg n̄yen kpaalaa Sangband nn bag bii kw̄ēn. ¹³ M̄à kpēh̄da-n na h̄à jaar̄ḡa hayen kod n` kaa n nan Lawodisee n Heraafolis tiiba mēh̄ba kaa.

¹⁴ T` tuur d̄ogd Lukaaswu n D̄emaas bà ta seen̄a-n. ¹⁵ Seen̄-n Lawodisee teelbee m̄embee n nan Nimfaawu n kpaturu h̄ú kpogla taa h̄aa h̄uu.

¹⁶ Ban kee bà kaal-n wadgankena lee, h̄ee-n na bá ta kaal-ka Lawodisee kpaturun! L` saa, nii m̄omba n` ta kaal bee nn ba bà ta to-n kee.

¹⁷ Biiir-n-ma H̄aarkif na h̄á l̄óm̄ n̄omb η̄m̄ēēgb Saberma nn lo-wu bii h̄en ka bo na h̄á h̄em-b h̄om!

¹⁸ Man F̄óla, man seen̄a-n ka foor seen̄bii n mà nufu. Deer-n na mà ba sargan!

Sangband h̄omgu b̄em n` man!

F̄óla wadnoogrga han da h̄od

TESALONIIK TIIBA

kee

————— B` ba wadgankenan bii —————

*F̄óla h̄oda wadgankena Tesaloniik Krista tiiba. Wii da kolg kan kpaturh̄uu (Tumtba η̄m̄ēegt 17.1-4). K̄orguu da ba Masedonii kpadn, goona Gr̄ees tantn. Kpadii k̄orbermḡu nnii. Yagtiiba k̄orgun. Saanba da ta ba kan, bá kod ba na *Yuudaa tiiban. F̄óla weriib da ba mag n Yuudaa tiiba biiba, bá voom-wu. H̄à wadgankena, h̄à h̄oda-ka bá tii gw̄ēt h̄en kw̄ekw̄elm bee. Lee, h̄á ka m̄ōo-ba weriib.*

– *Hubi1^{ga} kakeh̄nan hubi3^{gan} weraa-t F̄ólwu n Tesaloniik tiiba tuurnt. F̄óla homra kpaturh̄uu h̄en gw̄ēt t` ba h̄om, h̄à ka deeda-ba η̄m̄ēēgb wii m̄oma nn da her bà man bii. H̄à b̄oh̄ōo-ba lan nnii han bag na h̄à m̄ōo-ba nyaanb lee.*

– *Hubi4^{ga} n hubi5^{gan}, F̄óla sahl-ba η̄m̄eenm na bá ked n n̄ongan Krista tiit neermn. H̄à ta leeda-ba bii b` haam bà kpaturu bii jugun. Krista tinoogrba da h̄oda ka bag na Yeesu Krista η̄m̄etgn yelmaa. Ngu, l` ba na kpaturu tiiba kpiidra Yeesu Krista la ba η̄m̄etgn.*

Seen̄b

1 ¹ Man F̄óla, má n Silaaswu n Timotee t` foor wadgankena ka seen̄a Tesaloniik kpaturu h̄ú ba na Sa Sangband n Berm Yeesu Krist bà refu h̄uu. Sangband h̄omgu n d` nigiigu b̄em n` man!

F̄óla seen̄a Sangband Tesaloniik tiiba kaa na dii hera η̄m̄ēēgb

² T` seen̄a Sangband n` m̄embee n` jugun ka kpaá saa na dii hera η̄m̄ēēgb. ³ T` wen seen̄a, t` ka deeda h̄eruf̄ t` Sa Sangband n̄ongan n` gw̄ēt h̄en tiim nn h̄ena η̄m̄ēēgb lee, n n` η̄m̄ēegt nn weraa na n`